



Komunikadu Imprensa
05 Jullu 2022
Parlamentu Nasionál

JSMP apresia vontade di'ak Governu Timor-Leste hodi ratifika Konvensaun Internasionál kona-ba Direitu Ema ho Defisiénsia

Governu Timor-Leste, liuhusi Parlamentu Nasionál, iha 04 Jullu 2022 aprova Proposta Rezolusaun Nú.16/V(4^a) Ratifikasaun Adezaun Timor-Leste ba Konvensaun Internasionál kona-ba Direitu Ema ho Defisiénsia (KIDED) no Proposta Rezolusaun Nú.17/V(4a) Ratifikasaun Adezaun Protokolu Opsionál ba KIDED ho votu unánimu 45.

“JSMP apresia esforsu no serbisu Parlamentu Nasionál no Governu hodi aprova no ratifika ona Konvensaun ne'e. JSMP husu atu Governu no instituisaun estadu relevante sira atu tau prioridade ba iha nia implementasaun, liuliu inklui iha programa sira Governu nian. Ida ne'e nu'udar mekanizmu ida hodi bele asegura ho di'ak liu tan protesaun no promosaun direitu sira ema ho defisiénsia nian,” dehan Diretora Ezekutiva JSMP, Sra. Ana Paula Marçal.

Iha intervensaun deputadu sira-nian durante diskusaun, konsidera tempu ona atu Timor-Leste ratifika Konvensaun ne'e hodi bele kumpri rekezitu internasionál sira ne'ebé prevee iha konvensaun ne'e, nune'e ita labele halo diskriminasaun ba maluk deficiente sira ne'ebé nia direitu durante ne'e hetan violasaun, liuliu direitu asesu ba eskola, serbisu no asesu públiku sira.

JSMP hein katak ho ratifikasaun ne'e bele ona responde ba públiku nia preokupasaun ba direitu ema ho defisiénsia sira-nian ne'ebé durante ne'e ladún hetan protesaun no promosaun husi Governu no parte interesadu sira hanesan saida mak JSMP rasik deskobre liuhusi peskiza ne'ebé halo ba kestaun ema ho defisiénsia no ratifikasaun ba KIDED¹. Alende peskiza ne'e, JSMP hamutuk ho grupu traballu ba asuntu ema ho defisiénsia, iha tinan barak halo advokasia ba protesaun no promosaun ba direitu sira ema ho defisiénsia inklui ratifikasaun ba konvensaun ema ho defisiénsia.

Iha parte seluk, JSMP rekomenda ba Governu atu bele kria lezislasaun

¹ Detallu husi relatóriu ne'e bele haree iha ne'e: <https://jsmp.tl/wp-content/uploads/Relatoriu-Ema-ho-Defisiensia-ho-nia-dezafiu-sira-Publika.pdf>

komplementár sira, inklui estabese Komisaun Nasionál ba Ema ho Defisiénsia hodi bele hala'o serbisu hodi responde ba direitu ema ho defisiénsia sira iha futuru.

Proposta rezolusaun sira inísia husi Governu iha fulan Maiu 2022 liuba no envia ba Parlamentu Nasionál hodi ratifika bazeia ba provizaun alinea f) parágrafo 3 Artigu 95 no parágrafo 1) Artigu 9 Konstituisaun RDTL no mós provizaun parágrafo 2 Artigu 131 Rejimentu Parlamentu Nasionál.

Entretantu Konvensaun ne'e kompostu husi Artigu hamutuk 50 ne'ebé regula kona-ba direitu no liberdade fundamentál sira ema ho defisiénsia nian no mós obligasaun Estadu parte sira-nian hodi bele kria mekanizmu polítiku, administrativu no lejizlativu apropriadu hodi bele realiza direitu no liberdade fundamentál sira ne'e.

Estadu ka Governu iha obligasaun hodi kumpri tanba Direitu Internasionál ne'e tuir provizaun parágrafo 2) Artigu 9 K-RDTL vigora automatikamente depoisde aprovasaun no ratifikasaun.

Atu hetan informasaun liutan favór kontaktu:

Ana Paula Marçal
Diretóra Ezekutiva JSMP
Diresaun e-mail: ana@jsmp.tl
Website: <http://jsmp.tl>

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl
Facebook: www.facebook.com/timorleste.jsmp
Twitter: @JSMPtl